



ՍԻՐԵԼԻ ԵՎ ԱԶՆԻՎ ԲԱՐԵԿԱՍ ԵՐՈՒԱՆԴ ԱԿԻՄՈՎԻԶ ՇԱՀԱԶԻԶԻՆ

Հայկ. ՍՍՌ Գիտությունների Ակադեմիայի Մ. Արեղյանի անվան գրականության ինստիտուտը այսօր տոնում է Ձեր ծննդյան իննսունամյակը: Այս ձեռնարկը արդար գնահատականն է Ձեր կյանքի և գործունեության:

Վաթսուն և ավելի տարիներ Դուք անձնուիրաբար նվիրել եք հայ մատաղ սերնդի կրթական և դաստիարակչական գործին, իբրև ուսուցիչ և տեսուչ: Նույնքան տարի էլ լուրի-մնջիկ այլ և այլ ամհատների ու հաստատությունների արխիվները և վերջերս էլ պետական արխիվն եք քրքրել, փոշիների միջից հանելով ձեռագրեր, որոնք նոր լուսաբանություն են տալիս մեր ան-

ցյալ պատմական երևույթների և գրական-պատմական դեմքերի մասին:

Ձեր այս օգտակար և գնահատելի գործունեությունն է, որ արժեքավորվում է այսօր: Մենք ևս, ձայնակցելով հասարակական գնահատական Ձեռնարկին, շնորհավորում ենք Ձեր իննսունամյակը և որպես հիշատակ նվիրում Ձեզ Ս. Էջմիածնի կողմից հայ ձեռքով գործած հայկական մի գորգ:

Աստուածային օրհնություն ենք հայցում Ձեզ վերա, որ երկարի Ձեր կյանքի արևը և պարզի Ձեզ նոր ույժ ու նոր եռանդ շարունակելու Ձեր քայլած ուղին հօգուտ հայ գրական կյանքի՝ ձգելով այսուհետև ևս Ձեր լուսման հայ գրական գանձարկը:

ՍԻՐՈ ՈՂՋՈՒՅՆԻՎ ԵՎ ՀԱՅՐԱՊԵՏԱԿԱՆ ՕՐՀՆՈՒԹՅԱՄԲ

ԳԵՎՈՐԳ Զ

ԿԱԹՈՂԻԿՈՍ ԱՄԵՆԱՅՆ ՀԱՅՈՑ

ԵՐՎԱՆԴ ՇԱՀԱԶԻԶԻ ՀՈՐԵԼՅԱՆԸ

Հունվարի 12-ին Հայկական ՍՍՌ Գիտությունների Ակադեմիայի կոնֆերանց-դահլիճում կայացավ հայագիտության ավագ սերնդի ներկայացուցիչներից մեկի, գրականագետ ու պատմաբան, ֆիլոլոգիական գիտությունների դոկտոր Երվանդ Շահազի-զի ծննդյան 90-ամյա և գրական-գիտական գործունեության 65-ամյա հոբելյանը: Ներկա էին Հայկական ՍՍՌ Գիտությունների Ակադեմիայի իսկական անդամները, պրոֆեսոր-դոկտորները, գիտական աշխատողները, պատմաբաններն ու գրականա-

գետները և գրասեր հասարակությունը:

Երվանդ Շահազիզի կյանքի ու գործունեության մասին ղեկուցումով հանդես եկավ ֆիլոլոգիական գիտությունների թեկնածու Ռ. Զարյանը:

Ողջունի խոսքով հանդես եկան Հայկական ՍՍՌ Գիտությունների Ակադեմիայի իսկական անդամներ Ավ. Իսահակյանը, Ա. Տերտեռյանը, վաստակավոր ուսուցիչ Սիմակ Սահակյանը, պրոֆ. Հ. Գյուլիքևյանը, Ս. Երեմյանը և պրոֆ. Ա. Շավարշյանը: Վերջում ելույթ ունեցավ հոբելյարը:

(«Սով. Հայ.» № 13 (7549), 1946 թ.)